

Edizioni

- letto 585 volte

Barbieri

I.
Lonc tens ai servi en bailence,
ke ne me fut gueridoneit;
ains ai tout perdut per souffrance
quant ma dame ne vint en greit;
or n'i ait mais poent d'atendence,
ains en ai si mon cuer osteit
ke faire en puix ma volenteit.

II.
Elle est de si haute vaillance
et de si tres fine biaulteit,
ke je fix folie et enfance
quant li descovri mon penseir;
mais ces gens cors et sa semblance
m'orent si d'amors enbraseit,
ke tout cuidai avoir troveit.

III.
A mult petit soustenence
m'avroit elle resconforteit
et giteit d'ire et de pesence,
ou j'ai si longuement esteit;
or me peirt ma fole esperance,
ke ceu ke j'ai tant desirreit
m'ait de toute joie giteit.

IV.
En li n'ai mais poent de fiance:
trop i ait orguel et fierteit;
et si sai de voir sens doutence,
trop de [fieen]sa biaulteit
et en sa simple contenance,
ke tot son cuer et son penseir
ait eincor en sa poësteit.

V.

Onkes Amors n'i out poussance:
c'est bien seü et esprovei;
en son gent cors sens mesestance,
ke tous li mons doit tant ameir,
n'ot onkes vilainne acoentance;
ains l'en ait Deus si bien gairdei
ke mainte gens l'ont compairé.

- letto 502 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/edizioni-29>